



**Sud Bosne i Hercegovine**  
**Суд Босне и Херцеговине**

---

Broj: S1 3 Iž 38355 20 Iž  
Sarajevo, 29.10.2020.godine

Sud Bosne i Hercegovine, u vijeću Apelacionog odjeljenja sastavljenom od sudija Zvezdane Antonović kao predsjednika vijeća, Mirsade Džindo i Vesne Trifunović kao članova vijeća, odlučujući o žalbi Selme Pezo Mulalić, Hidsmeer 6, Culemborg 4105 RJ, Holandija, izjavljenoj protiv Odluke Centralne izborne komisije Bosne i Hercegovine broj: 05-1-07-1-998/20 od 01.10.2020. godine o odbijanju upisa u izvod iz Centralnog biračkog spiska za glasanje izvan Bosne i Hercegovine za Lokalne izbore 2020. godine, u nejavnoj sjednici, održanoj dana 29.10.2020. godine, donio je

**R J E Š E N J E**

**Žalba se odbija**

**O b r a z l o ž e n j e**

Odlukom Centralne izborne komisije Bosne i Hercegovine, broj i datum navedeni u uvodu, odbijen je upis u izvod iz Centralnog biračkog spiska za glasanje izvan Bosne i Hercegovine za Lokalne izbore 2020. godine po podnesenim prijavama do 01.09.2020. godine, jer nisu ispunjeni uslovi propisani odredbom člana 3.15 stav 1., 2. i 3. Izbornog zakona Bosne i Hercegovine. U odnosu na žaliteljicu odbijen je upis iz razloga što potpis u prijavi nije istovjetan potpisu na identifikacionom dokumentu.

Protiv ove odluke žaliteljica je blagovremeno izjavila žalbu navodeći da se uredno prijavila za glasanje van BiH putem pošte, ali da se ne nalazi na spisku glasača.

Centralna izborna komisija Bosne i Hercegovine dostavila je ovom sudu odgovor na žalbu u kojem je predložila da se izjavljena žalba odbije kao neosnovana.

Ispitujući pobijanu odluku u okviru žalbenih navoda, vijeće Apelacionog odjeljenja Suda Bosne i Hercegovine je zaključilo da žalba nije osnovana.

Prema stanju u spisu ovo vijeće konstatuje da je Centralna izborna komisija BiH, prije donošenja ožalbene odluke, a prilikom razmatranja prijave za glasanje izvan BiH podnesene elektronskim putem dana 31.08.2020. godine, pravilno uočila da potpis na obrascu prijave za glasanje izvan BiH za izbore-PRP-1 nije istovjetan potpisu na identifikacionom dokumentu.

Postupajući na način opisan u prednje utvrđenom činjeničnom stanju, podnositeljica žalbe je postupila suprotno odredbi člana 3.15 stav (1) Izbornog zakona BiH („Službeni

glasnik BiH", broj 23/01 do 31/16), kojom je propisano da državljanin BiH koji privremeno živi u inostranstvu, a ima biračko pravo u skladu sa Zakonom i koji je upisan u Centralni birački spisak, da bi se nalazio u izvodu iz Centralnog biračkog spiska za glasanje van BiH, dužan je da za svake izbore podnese prijavu Centralnoj izbornoj komisiji BiH. Prijava mora biti zaprimljena u Centralnu izbornu komisiju BiH prije roka koji odredi Centralna izborna komisija BiH, u periodu nakon raspisivanja izbora. Uz popunjenu i potpisanu prijavu podnosilac prilaže i dokaz o identitetu i podatke o tačnoj adresi u inostranstvu, te izjašnjenje o opciji glasanja u diplomatsko-konzularnom predstavništvu ili putem pošte.

U konkretnom slučaju, žaliteljica je dostavila prijavu i kopiju lične karte, ali je pravilno utvrđeno da se potpis na prijavi očigledno razlikuje od potpisa na identifikacionom dokumentu koji je priložen uz prijavu. Iz navedenog razloga, i po shvatanju apelacionog vijeća, nisu ispunjeni uslovi da bi se žaliteljica, u smislu člana 3.15 stav 6. Izbornog zakona BiH, našla na izvodu iz Centralnog biračkog spiska za glasanje van BiH.

Takođe, napomene radi, žaliteljici nije oduzeto biračko pravo za Lokalne izbore 2020.godine, nego samo mogućnost glasanja putem pošte izvan BiH, jer ista može glasati na redovnom biračkom mjestu u općini u kojoj ima prijavljeno prebivalište u BiH.

Iz navedenih razloga Apelaciono upravno vijeće ovog suda nalazi da je pobijana odluka Centralne izborne komisije Bosne i Hercegovine pravilna i zakonita a žalba neosnovana, pa je istu primjenom odredbe člana 81. stav 1. Zakona o upravnim sporovima Bosne i Hercegovine („Službeni glasnik BiH“ broj 19/02 do 74/10) valjalo odbiti.

PREDSJEDNIK VIJEĆA  
S U D I J A

Zvezdana Antonović